

## Pablonun Timoteo Cunu Fomani

### Pablonun Timoteo cunu fomani

**1** <sup>1</sup>Unquian Pablo un mia cunu fomai min tapinon. Upan Diosin ua catonni Furu fu rafunon ahuun tsain Cristo Jesushuunoa un yoifafainon. Nan nocon Numamisi Jesucristo futan ua yononi manifoti isca huaquin un yoinon, —Jesucriston noco nashonishaquin arus fusti nocu Upa Dios ari iyoshquinran, —ishon un ato yoinon. <sup>2</sup>Ascano un mia Jesucristohuunoa yoliaiton min icoinra huani. Ascacun min icoinra huahuunshon min uhuun facu cuscaracoin. Un miuhun fasi noi. Nocon Upa Diosin futan nocon Ifo Cristo Jesús mia noiquin mia cushusharafain miuhunrifi ramapaia. Ascashon min ointi mia main huamanon.

### Futsan amaquiri mato yosiaiton icoinra huao yoihoo ato nicanonfoma

<sup>3</sup>Ascan un Macedonia ano caquin un mia yoini isca huaquin, —Efeso anoashu cariyamahuun. Anoa futsafoan ato Diospan tsain amaquiri yosimisifo. Ato yoihoo afananasca huaquin yosinonfoma, —ishon mia yoini. <sup>4</sup>Non Diosin tsain yosiquin futsafo non yoitiro Jesús icoinra huanonfo. Ascan nan amaquiri yosimisifoanasca huatamarocon shunipafo yafi aton shunifohuunoari yoafo. Non yosiquiasca huaitocai Diosin noco icoinra

huamapaiyai cuscan tsoan tapitiroma. Nicafiacani afohuunoa fochishmanantanantirofo. Ascashon ato yoihoo afanan shunipafo yoinonfoma. Aton tsain shatumahuu.

<sup>5</sup>Un nannori yonoa noinanfo. Ascashucai non nocon ointi muran ahuashta shinanchacatamarocon shinanshara fustifain nocon nomuranshori non nocohuunoa ahuacai chaca shinanyamafain non Jesús icoinra huacoinnai cuscan non futsafo noicointiro. <sup>6</sup>Atirififainca asca huacanima. Ascatamarocon Diosin yonoa cuscan man cachiquiri huaifo. Ascashon tsain ahuama ipaitsi yoimisifo. <sup>7</sup>Ascashon Moisés nocon yononi cuscan futsafo tapimapacaiquianfoan yoimisifo isca huaquin, —Moisés yononi cuscan man non fasi tapicoinran, —ishon yoifiamisishacaquicai yosipaiyaifo cuscan tapicoianfoma.

<sup>8</sup>Man non tapia Moisés yononi cuscan shara yosimainquin cayacafico futsafoan nicasharatiro isharashcaquin. <sup>9</sup>Man non tapia tsoa isharamisi Diospan tsain fusti tanasharashucay Moisés yononi cuscan yopacanima isharashquin. Ascan nan Diosin yononi cuscan nicacasmamisifo tapimapai chaca huamisifo cuscan shatuyamaifoan ato onaintimashqui.

Ascashu nanfo isca huamisifo. Diosin yononi cuscan nicacasmamisifo icain

Diosin ato shinanmapaiyai cuscan shinancasmafain chaca futsa futsatapafó huamisi icain aton apa yafi ahua chaca huafain rutumitsamisi icain.<sup>10-11</sup> Aton ahuinma non aton funuma fu icain nocofunufo yafi ainfofo chaca huatanamisi icain futsa curushcain aton yonomati imafain chanimisifo. Ascacanashu ahuara futsa Diosin noco sharacoin yononi cuscan nicacasmacani. Nanscarafó Diosin ato nicamapai nan yononi cuscacoin anonfo. Ascafia chaca huamisifo cuscan shatuyamaifoan ato onaintimashqui tapinonfo. Upa Diosin ua yononi cuscan ahuun tsain sharacoin nantifi yorafo un ato yoinon. Nocon Dios fasi sharacoincun.

**Diosin ahuun ramapaicun  
Pablunun aicho huani**

<sup>12-14</sup>Noncai Diospan Furun onanyopaonima. Ascashon un yoipaoni isca huaquin, —Jesuscai Diospan facuma. Aafin chanimisicoinquin, —un huapaoni. Ascashon ahuun yorafori un fasi ato omitsisca huapaoni. Un nocofunu fasi musucoin ipaoni. Un tapipaonima un Diospan Furucoint chaca huafiaquin. Unasca huafiaiton uhuun ramapaiquicai ua onaintimanima. Cristo Jesús ua noiquin ua shara huashofain ua tapimani ahuuscashomain un icoira huatiroquin.

<sup>15</sup>Un natian mato icon yoiai cuscan man icoira huatiro. Cristo Jesús nai ariashu mai ano fotoni yora chacafo numashqui afu ipanonfo. Ascan unfi chaca huaqui finacaimisiquin. Tsoa futsacaiasca huamisima.<sup>16</sup> Ascacun uhuunshon Upa Diosin nantifi yora ismatiro nam chaca finacaia ahuun chaca soashotiro afu ipanon. Isca huaquin shinantirofo, —Shinancapon, Pablunun fasi chaca huapaonifiacun Jesucristo fasi Pablo noiquin. Jesús

uarifi noitiro. Pablo numaquifin uarifi numatiroquin un afu nipanon, —icashon shinantirofo.<sup>17</sup> Ascano nocon Dios Niaifocoin nipanaca. Arus fusti Dios futsa yamai. Tsoancai Dios ointiroma. Nantifain non ahuunoa yoisharapacunaca isca huaquin, —Mirusu fustiton nantifi tapicoian. iAicho! —ishon non yoipacunon.

<sup>18</sup>Timoteon min uhuun facushtan. Un mia yoiai cuscan nicasharahuu. Min Dios yonoshonataima mihuunoa iquisi inonpacocai cuscan yoisharayoni. Ascan natian afanan un mia yoisharai. Mihiunoa yoisharani cuscan nanscasi huafafainhuun. Satanás noco chaca huamapaifaiton a nicatamarocon Dios fusti tanasharafafainhuun chaca huashquima.

<sup>19</sup>Min Jesús icoira huacoinmisi cuscan unuyamahuu. Ahuunoa shinanfafaihuun. Ahuara chaca huashon Upa Dios yoiriscahuun min nomuranshon ahua chaca afanan shinanshquima. Atirifiton chaca huafiacashon Upa Dios yoimisifoma arus fusti shinanfiacaquin shafacafi cainmacasmacaquin. Ascashon tsoan Dios yoipaimisima aton chaca soashonon. Asca chaca huaraiifoan afanan icoira huacanima. iOhua! Afananci atom nomuran shinansharamisifoma.<sup>20</sup> Noco yora rafu nanscarafauquin. Himeneo yafi Alejandro un ato Satanás inan ato onaintimanon. Ascashon tapinonfo afanan noco Ifo Jesús chaca huanonfoma.

**Ahuuscashomain non Dios cufitiroquin**

**2** <sup>1</sup>Natian tsain futsa un mia yoinon. Ua nicasharapun. Upa Dios cufifafaihuun. Nanfin fasi shara finacoianquin. Ahua futsacai ascarama. Nantifi yorafohuunshon Upa Dios

cufihuun ahuun Yoshin Shara yopaifo cuscan ato cufishohuun. Diosin atohuun ramapainon cufishofain Diosin ato amapaiyai cuscan cufihuun nanscasi huanonfo. Atohuunoa Upa Dios yoihuus isca huaquin, —iAicho! Upa Diosin min na yorafo shara huashoshquiran, —ishon cufinquin nannori yoihuus.

<sup>2</sup>Nannoricoin nan niaifocoin yafi ahuun niaifo patasharinoafori ato Upa cufishohuun noco iquisharanonfo ahuaraton noco fucash huanonma. Ascano Dioshuunoa non shinanfafaitiro a cuscara sharacoin iishquin.

<sup>3</sup>Ascacun nan nocon Numamisi Dios noco oian non isharaiton oin unimacointiro. Nanscara fuchipai. <sup>4</sup>Nantofin nantifi yorafo numapaiquin. Ascashon aton chaca soashona afu ipanonfo. Cristohuunoa iconcoin tapisharanonfo. <sup>5-6</sup>Iconcoin Diosisfin fustiquin. Futsa yamai. Afin sharacoinquin. Yorafocai a cuscara foma. Nantifain man non chaca huamisi. Ahuara chacacai Dios fu itiroma. Nan Jesús nocon cuscara nocofunuquin. Arus fustitofin noco nashoniquin nocon chaca soashoshquin non Dios fu ipanon. Nantifi yorafo numapaiquin noco nashoni. Upa Diosin yorafo

tapimapaiquin Furun Jesús mai ano nichini noco nashoshquinon. <sup>7</sup>Ascacun Upa Diosin ua catonni Jesús fu rafucain ahuunoa uhuun caifomafo un yoinon. Atorifi un Jesushuunoa icon yoiatton icoinra huanon. Ascan uncai mia paraima. Icon fustisi mia yoi.

<sup>8</sup>Ascano nantifi manifotifainmain Upa Dios cufipainonfo. Ahuara chaca yoicani fochishmanantananyamacain sinatamari Jesús tanasharaquin mushainacahuan Dios cufipainonfo.

<sup>9</sup>Ainfofori un yoisharapai non ichanaintian isca huaquin shinanonfoma, —Uhuun saya sharashtacoin sahuufain

fusoqui cunucain uhuun foo shara huafain nantifain ua oinonforan, —ishon ascacaquin man icai cuscan matohuunoa futsafo shinansharamapaiyamacahuun.

<sup>10</sup>Ascatamarocom ato futan ahua futsa shinancaquia Upa Dios fusti shinancoincahuun. Man yoimisi isca huaquin, —Non Dios noicoinran, —ishon. Manmain icoincain futsafo shara huashofafainaahuun. Un ainfofo anori yoisharapai.

<sup>11-12</sup>Ascano Diospan tsain nicashquin man ichanantiro. Ascacun mun yoimisi ainfofoancai nocofunufo yonotiroma. Diospan tsain yoimisiton yoiaiton puusiquima ainfoan nicasharatiro yoiai cuscacoin tapifain nan yoiai cuscacoin aashquin. <sup>13</sup>Diosin Adán onihuaquin tau huani. Chipo Evari onihuani.

<sup>14</sup>Ascacufin Satanascai Adán parayonima. Eva paraquin tau huani. Nanto chaca huaquin tau huani. Diosin ato yononi cuscacai nicanima. Ascano ichanainfotian ainfofoan nica fustitirofo. <sup>15</sup>Ascafiaucun ainfofoan facu caiyaintian isin muyotiro. Ascafiaflashon Jesús icoinra huashon noifain a cuscara shara icanashu Dios fu ipatirofo.

### Ahuu cuscaramain ichanano cushumisifo itiroquin

**3** <sup>1</sup>Icon tsoan Diospan yorafo cushumisi ipaiquin yonoshosharafafainpaitiro. <sup>2</sup>Nan nocofunu cushumisi shara fusti itiro.

Ascano ahuara chaca ahuunoa shinainfocain cushumisi itiroma. Ahuin fusti ya icain pau fuchipaimisi iyamacain ahuara ahuuscarafaino shinansharamisi icain ahuara shara fustisi shinanpaimisi icain ahuun pushu muran yora iquimasharamisi icain

futsafo Diospan tsain  
tapimasharatiro icain.

<sup>3</sup> Paumisi iyamacain  
sumutmitsapaimisiri iyamacain  
futsafo yoisharapaimisi icain.  
Ascatarai  
fochishmanantanapanpaimisi  
iyamacain  
pui noipaimisiri iyamacain.  
Nan cuscara nocofunu catonhuun  
icoinra huafo ato cushumisi inon.

<sup>4</sup> Ahuin yafi ahuan facufori ato  
ismasharaiton  
ahuun facufoan ahuunoa  
shinansharafain  
nicasharanonfo. <sup>5</sup> Ascano ahuin  
yafi ahuun facufo  
nicamasharayamaino  
ahuuscashomun nan Diospan  
yorafo ichananmisifo ato  
nicamasharatiroquin.

<sup>6</sup> Ascacun nocofunun rama Jesús  
Ifoatocai ichananmisifo  
cushumisi itiroma. Nan cuscara  
man catoanfin shinanqui isca  
huatiroquin, —iAicho! Unfin  
fasi sharaquin. Ascan ua  
samamashta catoanfo un ato  
cushumisi inon. Ascan uncai  
futsafo cuscarama. Un ato  
finoncoianran, —icashon  
cacadapaimisi itiro. Nannori  
Satanás noco  
shinanchacampai.

<sup>7</sup> Ascacun isharaiton oinmisishacaquin  
nan icoinra huamafoanri  
ahuunoa shinansharacashon  
catontirofo nan ichananmisifo  
cushumisi inon. Nanscara  
iyamaiton Satanás ahuun  
nomuran shinanmatiro nan  
chaca huamisi cuscan. Ascashon  
nan chaca huamisifohuunoa  
shinanquicai a ichananmisifo  
tapimasharatiroma.

**Ahuu cuscaramain ichananfo shara  
huashomisifo itiroquin**

<sup>8</sup> Nanscarifiai ichananfo aton shara  
huashomisifo isharamisifo  
futsafoan atohuunoa  
shinansharafain  
icon fustisi yoimisifo. Nan  
cuscarafo ichananfo aton shara  
huashomisifo itiroquin. Iscarari  
itirofo.  
Paumisi iyamacain  
pui noimisiforai itiroma.  
<sup>9</sup> Ascashon tsoancai  
Jesushuunoa tapiyopaonima.  
Natian ahuunoa Diosin noco  
tapimanai cuscan tsoan nan  
icoinra huaoan shara  
huashomisi itiroquin. Ascano  
fasi finacaiquin Jesushuunoa  
tapipaicoian nan cuscrafain  
ichananfo aton shara  
huashomisi itiroquin.  
<sup>10</sup> Tsoan ichananfo ato shara  
huashomisi ipaiyaiton iquisi  
oinsharayotirofo.  
Isharacoincaimain ahua chaca  
huamaquin. Ascan oianfo  
isharacoincacainaiton nan  
cuscara ichananfo shara  
huashomisi itiroquin.  
<sup>11</sup> Aton ahuinfori isharacoinmisi icain  
yoiti huamitsapaimisi  
iyamacain paunmisiricai  
itiroma. Ahuara shara futsa  
aquin Jesushuunshon  
asharamisi itiroquin.  
<sup>12</sup> Nan ichananfo aton shara  
huamisifori  
ahuin fustiyafa itirofo.  
Ascashon ahuin yafi ahuan  
facuforifi onihuaniti. Nanfoanri  
Jesús tanasharanonfo.  
<sup>13</sup> Nanscara shara huashomisi  
ichananfoan ahuunoa yoisharatirofo.

Ascashon nanton nocon Ifo Jesucristo  
icoinra huaquin finacointiro.

**Tsoan Jesucristohuunoa nicayopaonima  
cuscan Pablonun cunushoni**

<sup>14-15</sup> Uhuun facushtan Timoteo un mi ari  
cariscapaifai un funa caiyamaquin un mia  
tapimai ahuscashumain ichananmisifo  
isharatirofoquin. Uhuun cunuuhunshon un  
mia tapimayoi. Jesús icoinra huafó  
ichananmisifo nanfotín Diospan  
yorafoquin. Ascan nan Dios ipanaca.  
Ahuun tsain iconcoin ahuun yorafo nan  
ichananmisifohuunshon futsafori  
tapimaiquin. <sup>16</sup>Icon atirifitocai tsoan  
Diospan tsain tapiataima isharashcaquin.  
Ascafia Jesushuunoashu non isharatiro.

Aafin Apa Dios icariashu mai ano  
fotoni nocon cuscara yoracoin  
iishquin.

Ascatarifi Diosin Yoshin Sharapan  
ismapaoni Jesuscái ahua chaca  
huamisima icon fustisi imisi.

Diospan oinmati afu nai muran  
icafoanri oinnifo.

Ahuunoashu manifoti futsafoan  
yoiqui isca huamisifo, —Jesús  
Upa Diosin facu. Ascashon arus  
fusti maton chaca soashotiroran,  
—ishon yoifoanfafainmisifo.

Yoliafoan nicacanashu atirifi manifoti  
anoshon icoinra huacani.

Ascashu Jesús naafiaшу mai  
murannoashu funini.

Chipo afanan Apa icano  
nuinacahuani arifi nantifiton  
aton niaifocoin iishquin.

**Atirifain afanan Jesús icoinra  
huayamafiacashon futsafo iconma  
yoipaicaní**

**4** <sup>1</sup>Diosin Yoshin Sharapan noco  
cayacafi tapimayoni atirifiton Jesús  
potaifo cuscan. Ascashocai afanan icoinra  
huapaitama nan yoshin chacafohuunshon

ato yoipaiyaifo ato tanacani  
funoshcaquin. <sup>2</sup>Nan paramisifoan  
chanihuunoasi shinanfafaimisifo cuscan  
nannorifi futsafori tapimashcani.  
Nanfoan chani fustisi yoifafaincaquicai  
afanan ahuara iconcoin shinantirofoma.  
Chani fustisi tapiafo.

<sup>3</sup> Ascashon fasi amaqiri futsafo  
yosicaquin isca huacani, —Manca  
fianantiroma. Atirifi tushu man  
pitromaran, —ishon ato parapaicani.  
Anori yosipaifiaifoan Upa Diosin nantifi  
tushu onihuani cuscan non nanfo  
unimacain pitiro. Ascashon piquin non  
Upa Dios, —iAicho! —huatiro. Ascan  
non Diospan tsain icoinra huashon  
ahuara iconcoin non tapitiro.

<sup>4</sup> Ascan nantifi Diosin onihuani cuscan  
sharacoin. Non ahuara potatiroma.  
Nantifi Diosin onihuafó non piquin,  
—iAicho! —huatiro. <sup>5</sup>Diospan  
tsainhuunshon non Upa cufiaino nantifi  
Diosin onihuani cuscan sharacoin itiro.

**Jesucriston yonoshomisi shara**

<sup>6</sup> Uhuun facushtan Timoteo un mia  
tapimanai cuscan min icoinra huua  
futsafo mirifi min ato tapimashu min  
Jesucristo yonomati shara itiro. Nan  
tsain shara Jesushuunoa min icoinra  
huamisi. Facushon min Diospan tsain  
icon nicamisi cuscan nanscacock min  
tanasharacoinmisi. Shafatifi nan tsain  
shara min nomuran nanuhuun futsafori  
tapimasharashquin.

<sup>7</sup> Ascafia futsafoan shunipafo cuscara  
ato tapimapacani. Ascan nanfocai  
Diospan tsainma. Ascacun ato  
nicayamahuu. Aton nicatamarocon  
Diospan tsain fusti oinsharahuu a  
cuscara shara iishquin. <sup>8</sup>Non ejercicio  
huaino noco caya non shara huatiro  
mutsisipa iishquin. Nanscarifiai non  
Dios cuscara ipaquin ahuun tsain nocon  
nomuran non nanuaiton ahuun curushu

noco inanshquin. Nancaifin shara finacoianquin. Natian noco shara huatiro. Ascashon non Jesusqui nocoaiton noco imasharapacunaca.  
⁹Nancaifin min icoindra huatiroquin.

<sup>10</sup>Ascano non fasi curushu yonoshofafaincain man non omitsiscamisi futsafo nan tsain shara icoindra huanonfo. Nonfin tapia nocon Dios nipaancaton nocori nimapacutiroquin. Afin nantifi yorafo nashoniquin. Ascafia icoindra huafoti afu nipatirofo.

<sup>11</sup>Nanfo un mia tapimanai cuscan huafain un mia yonoai cuscari futsaforifi tapimafain ato yonohuun Diospan tsain icoindra huanonfo.  
<sup>12</sup>Timoteo icoindra huaa futsafo ato ismahuu min Jesushuunshon ato yoisharafain mirifi isharacain min Jesus icoindra huashon atohuun min noitiro. Ascacun ahua chaca huapaitama Jesus cuscara isharahuu. Pushcoifashi min ascaitocai mihuunoa tsoa ahua chaca yoitirofoma.  
<sup>13</sup>Un miqui nocaitian atofu min ichananshon Diospan tsain yoia cuscan ato anushoquin yoisharafain yosisharahuu.  
<sup>14</sup>Ichananfo ato cushumisifoan mia manmanshon cufishonaifono nantianri Diosin mia amapaiyai cuscan mia ashoni min icoindra huaa futsafo tapimasharafain min ato cushusharanon. Ascan Upa Diosin mia cashman tapimani cuscan huafain futsafori shara huashofafainquin shatuyamahuu.

<sup>15</sup>Un mia yonoa cuscan nantifi huafafainhuun ato ashosharashquin. Ascaifin min shafatifi itisharatiroqui. Ascaquin ahua futsa shinantaquima nan min acai fustisi ashrafafainhuun. Min ascaiton oinquin yoitirofo man min fasi itisharacoian.  
<sup>16</sup>Ascacun oinfain. Nantishotapiquin min isharacain min ato cayacafi Diospan tsain

tapimasharanon. Min ascaiton Diosin mihuunshon ato numatiro afu ipanfonchaca huashcaquima. Mirifi min Jesus fu rafucacaintiro. Ascaquin min nomuran unimashquin.

### Ahuuscashumain icoindra huaa futsafo fu non isharatiroquin

**5** <sup>1</sup>Ascashon nocofunu iyoafu tsain curushu yoiyamahuu. Ascatama min upa min yoisharatiro cuscan huafain iyoafu futsafo yoihuu. Min ushtocinfo min yoisharatiro cuscan huafain nanscarifi chipocu futsafo yoihuu.  
<sup>2</sup>Ainfo mustufori min uhuacoin min shara huatiro cuscan huafain atorifi shara huahuun. Ascashon min chico yafi chipi min shara huamisi cuscan huafain shomayafori shara huahuun. Ato furi ipaiyamahuun. Ascatama atohuunoa shinansharahuun.

<sup>3</sup>Ainfo funuomacoin facuomacain fafaomacai nan icoindra huafu ichanangoan cushusharatirofo.

<sup>4</sup>Ascafiafunuoma futsan facufo ya iyamaraifafayashon nanfoan cushusharatirofo. Jesus tanasharapaiyifoan nansca huatirofo. Diosin nanscara fuchipai.  
<sup>5</sup>Ainfo funuoma ahuun yoraomashon Dios fusti shinanquin. Isca huaquin cufitiro,  
—Upa Diosin ua cushusharahuu,  
—ishon cufitiro. Shafatifi yafi yamatifiri Upa Dios cufifafaintiro.

<sup>6</sup>Ascafia funuoma futsafocai ascatiroma. A futsan shinain cuscan huaquin shinantiroma. Futsa afin apaiyai cuscan fusti shinanfafaitiro. Ascaquicai Dioshuunoa shinansharatiroma. Ascashon pushuti chani yoifoanfafaitiro. Nan cuscarafoan chaca huafafaincain Dios fu nipatirofoma. Ascashu nifiashu man naa shinantsaifo. <sup>7</sup>Timoteon nanti un mia yoiai cuscan funuomafohuunoa

ichananmisifori tapimahuu. Min ato tapimanai cuscan icoinnaifoan tsoancai atohuunoa yoitiroma isca huaquin, —Timafin. Nafoan aton funuomafo cushusharayamaifoan ato chaca huacaniran, —ishocai atohuunoa tsoan yoitiroma.<sup>8</sup> Tsoan ahuun yorafo cushusharayamafain ahuun afocoinri cushusharayamaicai Diosin tsain cununi cuscan aima. Nancaifin Jesús icoinra huafoma cuscara finacaiaquin.

<sup>9</sup>Ratoran funuoma futsa ahuun fari sesenta nocoataima ahuun funu niyoano furoma ipaonicai. Nanscaracai ichananfoan cushutiroma. <sup>10</sup>Ascan funuoma isharamisi futsafoan ahuunoa isca huaquin yoitiro, —Nan ainfo funuomaton futsafo shara huafafainiran, —ishon ahuunoa yoifain ahuun facufo tapimasharamisiran huafain futsafo ahuun pushu ano nococun ato shara huamisi icain Jesús icoinra huafain shara futsafoan ahuara chaca finoan atori shara huamisi icain futsafo ato shara huamisicain ascara funuomafo ichananfoan ato cushusharatiro.

<sup>11</sup>Ascafia funuoma yoshafoataima nan ichananfoan cushutiropoma. Rucun yoiyomisi, —Cristo fustihuunoa shinanquin un yonosharashopairan, —ishon. Ascafia chipo anori afanan shinanyamaquin fasi nocofunu tipaiquincai a yoiyoní cuscan afanan shinainma Jesús yonoshosharashquin.

<sup>12</sup>Ascacanashu Jesús yoiyoní cuscan ayamashu omitsiscaquin. Aton nomuran shinantirofo isca huaquin, —¡Ohua! Un Jesús yoiquin tau huani cuscacai un aama. Natiancái uqui unimaimaran, —ishon shinantiro. <sup>13</sup>Ascashon pushuti chani yoifoanfafaini. Yonotama shafatishon funocointiro. Nanscará man fuyamisi. Chaca yoimisi cuscan yoiama shara icuana. <sup>14</sup>Ascacufin ainfo yoshafoataifoma un ato yoisharapai isca

huaquin, —Man afanan shara itiro. Ascan man mato facucoin ayashon cushusharafain maton funuri pichasharashon man shara huashotiroran, —ishon un ato yoi. Man ascaitocai yoshin chacafoan matohuunoa tsain chaca yoitiroma. <sup>15</sup>Ascafia atirififoan Jesús potayoni Satanás tanashcaquin.

<sup>16</sup>Ratoran ainfoan Jesús tana amaqui funu nacun nan ichananfoan cushuamarocon ahuun yoracoinfoan cushusharatiro. Ascan nan ainfo tatuoma ahuun yorafomacun nan Jesús icoinra huafain cushusharatiro.

<sup>17</sup>Ichananfoan cushumisifo ato inansharatiro. Nanfoanrifi tanasharamisifoma yonosharashomisifo. Nan Diospan tsain yoimisiso non ahuun tsain yosimisifori inansharatiro yopai cuscan finonfo. <sup>18</sup>Nannori Diospan tsain cununi isca huaquin, —Moipan trigo camaqui puamafoanfafaini ahuun shacafo tsosaiton a runushcaquima shara huacahuun. Ahuuscashon pitironaquin. Asca huaquima piimacahuun, —ishon cununi. Ascashon cununi isca huaquin, —Tsoa yonosharaiton oinqui ahuun rafanan inansharacahuun, —icashon Diospan tsain cununi. Cununiri isca huaquin, —Mato cushumisifo non mato shara huashofafainmisifori ato inansharacahuun yopaifo cuscan finonfo, —ishon cununi.

<sup>19</sup>Futsan cushumisi yoiti huaiton a nicayamahuu. Ascano yora rafutan iyamarai rafu non fustifain nannorisí futsahuunoa yoiailoan man icoinra huatiro.

<sup>20</sup>Ascan chaca huua iconcun nan ichanaintian nantififain ointaifi yoihiu. Man ascaiton nicai ratucani ahuun caononfoma.

<sup>21</sup>Timoteon nocon Upa Diosin futan Furun Jesucristo non ahuun oinmati

shara afu nai muran icafoan noc oin. Ascacun aton ointaifi un mia yoinon. Nanti nan un mia yonoa cuscan ahuu. Nannorisi nantifi yoihu. Isca huaquin shinanyamahuu, —Nan uhuun yoracoinfoan chaca huafu cuscacai un futsafo yoima. Ascashon cushumisiton chaca huacucai un tsoa tapimaimaran, —ishon anori shinanyamahuu. Ascaquima nantifihuunoa nannorisi shinanhunu.

<sup>22</sup>Ascano ichananfo aton cushumisi catonriscayamahuu. Iquisi oinsharayohuu Jesús tanasharamisi iyamarai tanasharamamainquin. Tsoan ahuun chaca fomanpairiai cushumisi catonyamahuu. Ascaran min catoanfin mirifi min ahuun chaca fomanshoni cafiscaiquin. Ascacun ascayamahuu. Jesús cuscara isharacoinhuun. Ahua chaca huayamahuu.

<sup>23</sup>Natian tsain futsa un mia yoisharapai. Min shaquipan imisi. Ascacun unu fustisi ayaquima ichapama pau fata ayahuun cayasharashquin.

<sup>24</sup>Ascano atirifi yorafoan chaca huamisi cuscan nantifiton tapishocai. Tsoan nanscarafo catontiroma cushumisi inon. Ascan atirififain chaca huamisi cuscan tsoan tapicuma. Nanscarafoan fomanmisifo. Ascafia chipo Diosqui nococun a chaca huamisi cuscan puashoshquin nantififain ahuunoa tapinonfo. <sup>25</sup>Nanscarifiai futsafoan futsafori shara huamisi cuscan nantififain nanhuunoa man tapiafo. Ascan futsafoan arus fusti oianmafiano futsa shara huaquin ashomisi cuscan nanforifi chipo Diosin puashoshquin nantififain tapinonfo.

**6** <sup>1</sup>Ascan tsain futsa afanan un mia tapimanon. Nan yonomati Jesús icoingra huafu aton ifo yonosharashofain ato nicasharacoinon. Asca huaifoan oinquicai icoingra

huamafoan atohuunshon Diosqui shinanchacatirofoma. Ascashon non Jesushuunoa yosimisi cuscan shinanchacanonfoma. <sup>2</sup>Rato yonomatinin Jesús icoingra huano ahuun ifoa arifi Jesús icoingra huacun nicasharacointiro, —Nicayosma iyamacahuun. Ascatamarocon nicasharapaifafainaahuun, —ishon ato yoihu. Nanscara yonomati yafi afo Diospan facufo. Ascashu yora huatananfo. Yonomatinin ahuun ifo noiquin yonoshosharaino nan Upa Diospan facu sharacoin yonoshosharai.

#### Ahuaratono noco imasharacointiro

Ascacun un mia tapimanai cuscan huafain futsafori tapimasharahuun. <sup>3-4</sup>Un mia tapimana cuscan cayacafi sharacoin. Nannorifi nocon Ifo Jesús yosipaoni. Ascan tsoan anori yosiamananton amaquiri yosia. Nan cuscara cacapaimisi. Aatocai ahua tapiamia. Ahuun nomuranshon shinanchacaquin samamashta futsa fu fochishmanantanapaitiro. Ascatacái unimatiroma. Ascaquin futsafo ahuara ya cuscan fuchipaifain futsahuunoa tsain chaca huafain futsahuunoa shinanchacamisi. Futsan aqui oshon futsahuunoa yoiai cuscan samamashta icoingra huashon ahuun nomuran shinanqui isca huamisi,

—Nanto ua chaca huaaran, —ishon shinanchacafafainmisi. <sup>5</sup>Nan cuscara yorafoan chaca fustisi shinanfafaimisifo. Ascatari focheishmanantanafafainmisifo. Ascashon afanancái tsoan ahuara icon yoitirofoma. Chani fustisi tapiafo. Ascashon isca huaquin shinanmisifo, —Non nan tsain shara Jesushuunoa tanaicai non afanan ahua yopatiroma. Non fasi ichapayatiroran, —ishon amaquiri chaca shinanmisifo.

<sup>6</sup>Ascano non aya cuscan ichapaya iyamarai non ahuuomafiahori non unimacain Diosihuunoa shinanfafaini nancaitofin pui finoan shara finacaiaquin. Nanfin iconquin unimacai non isharaino nocon nomuran non unimatiro. <sup>7</sup>Non caincai non pui yafi mafo ya cainima. Ascatama ahuuoma non caini. Nanscarifiai non naacun nocu mai huaifotiancay non ahuara fotiroma. Nantianri nocon furo yoshincai ahua fotiroma. <sup>8</sup>Ascacufin non tushu yafi sahuutiyashu non unimatiro. <sup>9</sup>Ascafia tsoan pui yafi mafo ichapa fipaiquin samamashta shinanchacatirofo. Pui ichapa fipaiquin futsafo chaca huaiton pui fiishquin. Ascashon Satanás ato chaca huamaino amaquri shinanchacafain atorifi omitsisca huatiro. Ascataan ahuun unutauqui omitsiscapanacafo muran nocoshcani. <sup>10</sup>Ascataan pui noicaquin chaca futsa futsatapafo huatirofo. Atirifi fasi pui fipaicaquin Jesús cachiquiri huacoincani. Asca huacanashu aton nomuran omitsiscai finacoinmisifo.

#### Pablonun Timoteo yononi cuscan

<sup>11</sup>Ascafia Timoteon Upa Diosin mia catonni min ahuun yora inon. Ascacufin nanfoan pui fusti yafi chaca fustisi shinanfo cuscan shinanyamahuu ato cuscara ishqima. Ascatamarocon Upa Diosin mia imasharapaiyai cuscan nan fusti fuchipaihuu. Ascashu Jesús cuscara shara ipaicain a icoinra huafain Dios yafi futsafori noicoinhuun. Ascashon ahuara ahuuscarafiaiño Jesús icoinra huashon min tunutiro. Ascataan nantifi yorafohuun ramapaihuu.

<sup>12</sup>Ichananfo ano min ato cayacafi shara yoini isca huaquin, —Un Jesús icoinra huai. Afin uhuun Iforan, —ishon min ato yoini cuscan yora ichapafain mia nicanonfo. Ascacun ahuara

ahuuscarafiaiño nantishotapiquin Jesús icoinra huacoinhuun. Ahuarafoan mia shatumapaiyai cuscan nicatama Jesús fusti icoinra huafafainhuun. Ascashu shafatifi Jesús fu rafuhuun.

Jesushuunoashu min Dios fu nipatiro. Ascano natian nan min naitianri ahuara chacafu potahuu Jesús onancoinshquin. <sup>13</sup>Nan oni huati Upa Diosin nantifi ato nimai. Ascano Romanon niaifoan ahuun anu Poncio Pilato yocaiton Jesús ahuunoa yoisharani. Nan Dios futan Furun Jesusin ointaifi un mia yonoi.

<sup>14</sup>Un mia yonoai cuscacoin fusti acacainhuun. Ascashon ahuashta chaca huaquima un mia yona cuscan fusti nocu Ifo Jesucristo oaitian huahuun.

<sup>15</sup>Upa Diosin nichipaitian nocon Ifo Jesucristo afanan noocoqui nocoshquin. Nantianri non oinshquin. Nocon Diosin arus fusti nantifi iquisharafain nantifi niaifoan aton niaifocoinri. Ifofoan aton ifocoinri. <sup>16</sup>Arus fusti niaifocoin ipanaca. Nancai napanacama. A icarifi chashacoianquin. Ascano tsoacai aqui nocotiroma. Tsoanricai ointamari ointiroma. Ascacun non ahuunoa yoisharanon. Aafin curushcoin ipanacaquin. Nanscasiai.

<sup>17</sup>Nan pui ichapayafo yoihuu cacapaimisi iyamacain isca huaquin shinanonfoma, —iAicho! Un pui ichapayashu nantishotapiquin un isharacoincei, —ishon yoinonfoma. Tsoancal tapiama ahuitiamain aton mafo yafi ato pui cuyoriscaicai. Ascatama Dios fusti non icoinra huacun nocu nimapacusharatiro. Nanton ahuarafo non yopai cuscan nocu inan non afoqui unimanon. <sup>18</sup>Ato yoihuu futsafo fasi shara huafafainonfo. Yopaifo ato fishcoyamafain unimacoincay ratoran shafatan ato cashman inansharanonfo. <sup>19</sup>Ascashu chipo Diosiqui nocoaifotian ato inain

cuscacai cuyopacunacama. Ascatari Dios fu isharapacutirofo.

**Pablonun ahuun tsain  
unutaqui Timoteo yononi**

<sup>20</sup>Ascano Timoteon Diosin ahuun tsain sharapan mia tapimani futsaforifi min ato yoinon. Ascacun oinfain. Ahuun tsain oinsharayohuu futsafo cayacafi tapimashquin. Futsafoan Diosin tsain amaquiri yoimisifo. Afiranan

yoinonancaquin ipaitsicoin yoicaquin. Nanfoan yoimisifo non tapicoianran ifiacashocai tapiafoma. Ascacun atofu iyamahuu. <sup>21</sup>Atirifain nanscara shinanfo, —Non fasi tapicoianran, —ishon. Ascacanashu Jesús noco icoínra huamapaiyai cuscan afanan tsoan icoínra huacanima.

Upa Diosin mihiun ramapainon.  
Nanti.

*Pablo*